

**Fundur haldinn í Menningarráði Norðurlands vestra,
þriðjudaginn 14. október 2014, kl. 17.00,
í Eyvindarstofu á Blönduósi**

Á fundinn voru eftirtaldir mættir: Björg Baldursdóttir, Adolf H. Berndsen, Ragnar Smári Helgason, Guðný Kjartansdóttir, Bjarni Jónsson og Ingibergur Guðmundsson menningarfulltrúi.

Dagskrá:

1. Aðalfundur Menningarráðs 16. okt.

Aðalfundur Menningarráðs Norðurlands vestra verður haldinn fimmtudaginn 16. okt. nk., kl. 09.00, í Félagsheimilinu á Hvammstanga. Á dagskrá eru venjuleg aðalfundarstörf skv. samþykktum ráðsins.

Einn af dagskrárliðum fundarins er ákvörðun um þóknun fyrir fundarsetu í menningarráði á árinu 2015. Ákveðið að leggja til að upphæðin verði 15.000 kr. fyrir hvern fund á fulltrúa í menningarráði en þóknun formanns verði 22.500 kr.

2. Fjárhagsáætlun 2015

Fyrir fundinum lágu drög að fjárhagsáætlun fyrir árið 2015 sem ber að leggja fyrir aðalfund menningarráðs. Drögin voru samþykkt.

3. Starfsmannamál

Frá og með 1. sept. 2014 var Ingibergur Guðmundsson ráðinn sem atvinnuráðgjafi hjá SSNV atvinnuþróun með sérhæfingu á sviði menningarmála. Við þessa breytingu lækkar rekstrarkostnaður menningarráðs umtalsvert, þar sem laun og ýmis annar kostnaður færist yfir til SSNV atvinnuþróunar.

4. Sóknaráætlun landshluta 2015-2019

Fyrir fundinum lágu gögn frá stýrihópi um byggðamál, dags. 17. sept. sl. Í þeim gögnum kemur m.a. fram að framlög til menningarmála verði hluti af sérstökum þróunarsjóð landshlutans og muni sérstök úthlutunarnefnd sjá um úthlutun styrkja.

Einnig kynnti Ingibergur eftirfarandi samþykkt frá fundi menningarfulltrúa landshlutanna 10. okt. sl. en ályktunin er send stjórnnum og menningarráðum landshlutanna, stjórn Sambands ísl. sveitarfélaga og stýrihópnum:

Framtíð menningarsamninga

Segja má með sanni að almenn sátt ríki um menningarsamningana og framkvæmd þeirra, bæði þegar litið er til viðhorfa sveitarfélaga, starfandi listamanna og menningarstofnana. Um það vitna úttektir sem gerðar hafa verið á menningarsamningunum og umsagnir og ályktanir landshlutasamtaka.

Reynslan af starfsemi menningarráðanna á landsbyggðinni hefur verið góð og þau hafa reynst öflugur bakhjarl fyrir menningarstarfsemi, eftir starfandi listamenn og menningarstofnanir og stuðlað að auknu samstarfi og fagmennsku. Starf menningarráðanna hefur einnig verið í góðu samræmi við menningarstefnu ríkisins.

Nú þegar breytingar standa fyrir dyrum varðandi samning ríkis og sveitarfélaga um stuðning við menningarmál er áriðandi að tryggja að þær verði til þess að efla og styrkja menningarstarf á landsbyggðinni. Samfella þarf að vera í stuðningi við menningarstofnanir og verkefni en mörg verkefni á landsbyggðinni eru mjög aðþrengd eftir niðurskurð á fjárframlögum á síðustu árum. Frekari niðurskurður er ekki valkostur og ekki heldur sú stöðnun og jafnvel afturför sem blasir við ef miðað verður við óbreytt framlög til málaflokksins.

Í væntanlegum samningi þarf að tryggja aukin framlög ríkis og sveitarfélaga til menningarmála, bæði hvað varðar verkefnastyrki og rekstrar- og stofnstyrki. Jafnframt verður fagmennska að vera höfð að leiðarljósi við framkvæmd þess samnings sem gerður verður og hlutverk menningarráða landshlutanna má ekki vanmeta í því samhengi.

Á morgun mun stýrihópurinn ganga frá tillögum til landshlutasamtakanna um form og innihald sóknaráætlana landshluta, ásamt drögum að samningum.

Menningarráð tekur undir þessa ályktun og hvetur til þess að endurnýjun menningarsamnings verði lokið sem fyrst.

5. Málstofa um mótun menningarstefnu

Fyrir fundinum lágu drög að málstofu um mótun menningarstefnu sem menningarfulltrúar Norðurlands vestra, Vesturlands og Vestfjarða hafa unnið að. Gert er ráð fyrir að málstofan verði á Bifröst föstudaginn 21. nóv. nk. Samþykkt að menningarfulltrúi vinni áfram að undirbúningi þessarar málstofu.

6. Önnur mál

a) Tillaga um endurskoðun á samþykktum ráðsins

Fyrir fundinum lá eftirfarandi tillaga sem lagt er til að verði flutt á aðalfundinum 16. okt.:

Aðalfundur Menningarráðs Norðurlands vestra, haldinn á Hvammstanga 16. okt. 2014, samþykkir að fela Menningarráði Norðurlands vestra að endurskoða samþykktir fyrir menningarráðið og leggja breytingatillögur fyrir næsta aðalfund menningarráðs, árið 2015. Skulu breytingatillögur ráðsins liggja fyrir 15. ágúst 2015.

Greinargerð:

Núverandi samþykktir fyrir Menningarráð Norðurlands vestra eru frá árinu 2007. Frá þeim tíma hafa orðið töluverðar breytingar á framkvæmd mála, m.a. er í tillögum að sóknaráætlun fyrir Norðurland vestra, 2015-2019, gert ráð fyrir að umsóknar- og úthlutunarferli fjármuna til menningarstarfsemi færist frá menningarráðinu. Þá hefur vægi aðalfundar ráðsins breyst og færst að hluta yfir til ársþings SSNV. Einnig þarf að skoða fleiri þætti í starfsemi ráðsins, s.s. hvort það verði rekið áfram á sérstakri kennitölu.

Í ljósi ofangreindra þátta er nauðsynlegt að endurskoða samþykktir ráðsins en þeim verður aðeins breytt á aðalfundi.

Samþykkt að leggja tillöguna fram á aðalfundinum.

b) Bréf frá FÍSOS

Kynnt var bréf frá Félagi íslenskra safna og safnmanna (FÍSOS) þar sem kynnt er sú hugmynd að fara af stað með verkefni sem felst í því að greina og kortleggja stöðu íslenskra safna um allt land.

Menningarráð fagnar þessu verkefni og felur menningarfulltrúa að veita þá aðstoð við fundarhald á Norðurlandi vestra sem þörf krefur.

c) Drög að ályktun Árspings SSNV um menningarmál

Fyrir fundinum lágu drög að ályktun um menningarmál sem send hafa verið fulltrúum á Ársþingi SSNV 16.-17. okt. nk. Ályktunin var til kynningar.

d) Fundur menningarfulltrúa landshlutanna

Ingibergur greindi frá fundi menningarfulltrúa landshlutanna á Suðurlandi 9. og 10. okt. sl.

Þetta er síðasti fundur núverandi menningarráðs, þakkaði formaður ráðsins samnefndarfólki og menningarfulltrúa gott samstarf og óskaði þeim velfarnaðar.

Fleira ekki tekið fyrir. Fundi slitið kl. 19.00.

Ingibergur Guðmundsson